

Texte zur CD „Bösguet“

RAFAEL
NYFFENEGGER



1. Mys Lied
2. Bösguet
3. Schnaps
4. Glöön
5. Bodehochzyt
6. Relativ tot
7. Xundumunter
8. PC
9. Kommissar
10. Vorbild
11. Walross
12. Müüs
13. Schnäggehüsli
14. Kartei
15. Sächser
16. Vulkan
17. Rabenäscht
18. Hingerem Mond

1. Mys Lied

i hätt euch gärn es Lied mitbracht
woni euch vorgsunge hätt bis spät i d Nacht
doch veruss ischs mir plötzlich, i weiss nid wieso,
uf em Wäg da häre abhande cho
u drum hanis leider nid derby
ou wennis doch so schön wär gsy

das Lied wär eis gsy zum Lache
mit däm hätt i euch chli gluschtig welle mache
u hätt nech de bracht zum Nachedänke
s wär perfekt gsy zum Wytterschänke
das hätt i euch chönne mitgäh uf e Wäg
und zwar für gueti u für schlächti Täg

doch wenn dir das ghört hättet, ja denn wäret dir
villich gar nid so erfreut gsy a däm Lied und a mir
hättet Stüehl nach mir gschosse, gschroue: „Wäg, du Banous!“
eine hätt mi tödlich troffe - Gnickbruch statt Applous
u d Moral vom Lied würd äüä eh niemer verstah
drum bini ehrlich gseit ganz froh, dass is verlore ha

ja d Moral vom Lied würd ziemlich sicher niemer verstah
u drum bini wüerklich froh, dass is verlore ha

2. Bösguet

dr ganz Tag hani schlaflosi Nächt
u loufe schräg gradus
links isch mir grad no rächt
bim ne Rock-Konzärt hani dr Blues

i lose gärn neu Platte
usem Oldies-Shop
we ds Spiel scho lang fertig isch
de rüef i ersch: hopp

i läbe halt im Gägeteil
das finde i drum äbe steil
nimme alles uf e Huet
aber merci – süsch geits mir guet
bösguet

Beruhigigstee macht mi
böös u aggressiv
ds tüürschte Parfüm isch für mi
nume gruusige Mief

ar Wiehnachte gits Oschtereier
u im Summer nur Raclette
ir Stube tueni mi wäsche
u ir Chuchi steit mis Bett

i läbe halt im Gägeteil
das finde i drum äbe steil
nimme alles uf e Huet
aber merci – süsch geits mir guet
bösguet

a jedem Egge louft mängisch
öppis nid ganz rund
myni knappe füüf Minute
göh mindischtens e Viertelstund

i warte scho sehnsüchtig
uf ne Ladig Anti-Idiotika
für die wo nur am chlöne sy
u doch nie e Grund derzue hei gha

chunnsch blau hei ir Nacht
erläbsch dys blaue Wunder
u muesch mit uf d Wach
grünen isch d Hoffnig und ou ds Gras
bisich vernäblet weisch nümme wenn u was

gälb isch dr Nyd u dr Nasespitz
wed Gälbsucht hesch
de schwitzisch es bitz
u fragsch di schliesslich was isch de rot
nid nume d Liebi, sondern ou dr Tod

aber wettsch wüsse weli Farbkombination
über allne thront
ja das cha nume öppis sy
schwarz brünnett rot u blond

da bruuch i gar keis Gägeteil
das längt scho für mys Läbesheil
u nimm i euch mal ab und zue uf e Huet
chöit dir sicher sy
i meines nume – bösguet

3. Schnaps

da sitze sie alli ir Bar näbenand
u hei es Glas Bier i dr Hand
dr eint ou e Campari, Sherry oder Brandy
dä Abe nimmt so schnäll keis Ändi
u ganz näbe uss hockt e gspässige Maa
dä het grad zwöi Whiskeygläser vor sich stah

dä mit em Bier fragt: was isch äch das für eine?
dr Camparischlürfer seit: e Süffel würd i meine
ou dr Barkeeper wird gwunderig derby
u geit schliesslich zu däm Gascht hi
u seit: entschuldigung, aber s würd mi wunder näh
warum dir euch grad zwe Schnäpser heit la gäh

da seit dä Maa: wüsst der, das isch eso
my Kolleg isch uf Wältreis u no nid ume cho
drum wird jede Abe es zwöits Glas gläart
i trinke no eis für ihn u är macht ds Glyche umgekehrt
so chöi mir zäme suufe, wo mir ou grad sy
ganz ohni Teleportationstechnologie

paar Wuche lang geit das rächt guet eso
doch einisch am ne Abe isch alles anders use cho
es isch scho alles zwäg, zwöi Mal Whiskey pur
da chunnt är: tschuldigung, aber eine muess retour
dr Barkeeper ganz entsetzt: was isch denn passiert,
isch euche Fründ gstorbe, het me ihn entführt?

dr Maa lachet u seit: nei, s isch nüt settigs gscheh
aber wüsst der, syt hüt trink i kei Alkohol meh!

4. Glöön

dr Hätti, dr Wäri, dr Wetti und dr Chönnti
sy nid grad vom Erfolg verwöhnti
sy drum ehner e chli hirnerbrönnti
me chönnt scho säge: vier dummi Glöön
ohni die wär üses Läbe sicher zäh mal so schön

dr Hätti, dä hätt gärn e Feriewohnig in Monaco
dr Wäri, dä wär gärn im Meer am Bade irgendwo
dr Wetti, dä wett uf dr Stell zäh Millione übercho
dr Chönnti chönnt als Held i d Gschicht ygah
aber für all das müesste sie halt zersch mal afah

dr Chönnti, dä chönnt scho wenn är wett
u dr Hätti, dä hätt doch ou wenn är nume tät
dr Wäri, dä wär scho lang wenn är hätt
u dr Wetti wett scho wenn är chönnt
aber a das hei sie sich äbe scho lang gwöhnt

u sie mieche u sie schieffte u sie täte u sie chieffe
u sie niemte u sie gube u sie luuse u sie schrube
sie suufe u sie fruuse u sie ofne u sie schluuse
sie liefe u sie fienge u sie luge u sie verstienge
sie fluge u sie fuhre u sie gspure u erfuhre

aber will jede vo ihne nur im Konjunktiv läbt
hei sie no gar nie öppis würklich erläbt
sy drum bis jetzt nur im Nüt umegschwäbt
bis jede vo dene eines Tags erwacht
als dä wo cha, wo het, wo wott und wo macht

5. Bodehochzyt

är het Bodehochzyt gha
u isch i ds hölzige Pyjama gschloffe
syni letschi Stund het gschlage
will syni Zyt isch abgloffe
är het dr Löffel abgä
und isch ab id Schwümm
het i ds Gras bisse
und i Konsum go poschte geit är nümm

är het de Rägewürm guet Nacht gseit
isch vo dr Bildflächi verschwunde
är isch über e Jordan gange
und het dert dr ewig Fride gfunde
är het e Abgang gmacht
und denn ou no d Schrube
isch eifach uf u dervo
het müesse abtube

är isch nümme unter üs
het nämlich d Kurve gno
är het sy Geischt usghuuchet
und es chalts Füdle übercho
är treit sys letschte Hemmli
u zwar das ohni Täsche
het sich ohni es Stärbenswörtli
ufglöst in Stoub und Äsche

är isch nümm uf Bodehöchi
sondern e ganze Stock töifer
anderi säge, är syg bim Maa im Mond
versuech sich dert als Stärneverchöifer
sogar dr lieb Gott heig ne
für ne Platz ar Sunne abgworbe
und da gits doch tatsächlich Lüt
wo behoupte, är syg gstorbe!

6. Relativ tot

är sitzt am Tisch
u verchrüücht sich i sys Schnäggehuus
är sitzt am Tisch
u dänkt sich neu i Wahrheite us

är wott gar nid dusse sy
i dere ganze Idiotie
ab und zue chunnt e Frou verby
aber das isch ou scho alles gsy

är steit gäng chly da und lost zue
är seit nid viel, aber ämu gnue
är hasst alli wo är nid kennt
was nid heisst, dass alli wo är kennt ou Fründe nennt

är het Müeh mit Rächne
aber är weiss was zellt
är wird hässig, wenn me ne i nes Schema zwängt
oder i ne Egge stellt

nüt isch verdammt wenig
u weniger als nüt
isch alles wo är het
es het nie bis zu de Stärne glängt
är het sich sälber u das längt

und är seit: warum heit dir nid uf mi glost
i has euch ganz dütlich gäh z verstah
dass dir dr Kurs no chöit wände
bevor euches Schiff wird ungergah

das Schiff isch nur es Ruederboot
u wes untergeit syt dir alli relativ tot
relativ tot

7. Xundumunter

was mir alls unternähme zum in Form blybe
mir tüe uf d Ernährig achte und Sport trybe
Liegestütz mache, i Wald go jogge
anstatt deheim vor em Fernseh z hocke
so viel unternimmt me, u tuets no so weh
me setzt alls dra, gsund u munter uszgseh

gsund u munter möchte mir sy
gsund u munter u zfride derby

jetzt isch fertig mit Süessigkeite und Gebäck
mir wei üs doch verabschide vo üsem Späck
mit schwäre Chnoche rennisch dür e Wald
und fühlisch di när, als wärsch 120 Jahr alt
aber nach em erschte Tag gsehsch noni viel
das duuret halt e chly, das isch keis Chinderspiel

gsund u munter möchte mir sy
gsund u munter u zfride u froh derby

mir löh üs nid la lumpe bi Wytsprung u Seiligumpe
o we mir när müesse hueschte wie nach eme Rösslistumpe
mir stähle üse Körper ohni z murre
u sött denn znacht doch mal dr Mage chnurre
de föh mir wäg däm no nid a chlage
mir tüe paar Diätpille dür d Spysröhre jage

gsund u munter möchte mir sy
gsund u munter u zfride u froh u glücklich derby

jetzt müesse mir halt äbe e starche Wille bewyse
süsich tüe mir üs im Grund gno nume sälber bschysse
es choschet Chraft und Schweiss und duuret lang
doch einisch schmalet dr Buuchumfang
und für dä Momänt, wo du zfride chasch sy
nimmsch doch gärn die Asträngig hi

gsund u munter möchte mir sy,
gsund u munter u zfride u froh u glücklich u fit derby

jetzt ändlich isch es sowyt, ds Idealgwicht wär erreicht
aber nume guet ufpassse, dass' eim nid scho wieder preicht

d Verlockig isch gross und scho isch es passiert
hesch dr halb Chüehlschrank läär schnabuliert
und sobald wieder einisch uf d Waag tuesch stah
faht ds ganze Eländ vo vore a

gesund u munter möchte mir wüerklich gärn sy
d Frag isch nume: wär hilft üs derby?

8. PC

hüt rede alli nur politisch korräkt
u göh ständig mit dr Zyt
mängisch tönts zwar rächt suspäkt
aber mir mache dä Blödsinn doch sehr gärn mit
will kene wott i nes Fettnäpfli stah
bir tägliche Konversation
drum nütze mir begeischeret
die neu Sprachevolution

es heisst jetzt z.B. nümme Sparlampe
sondern ökologisch sinnvolles Belüchtigsgrot
und fulänze, das nennt sich syt neuschtem
Vorbereitig uf d Maturität
und e Tannebaum isch hüt es Nadelghölz
mit Religionshintergrund
political correctness isch äbe luschtig u gesund

hüt trinkt keine meh es Glas Champagner
sondern Bläterliwasser mit Knalleffekt
wär früecher ganz eifach dumm isch gsy
het hüt e liechte bis schwäre Hirndefekt
und es heisst ou nümme Ranze
sondern Resärvespycher
mit däm Vokabular überzügsch immer, überall u sicher

ou gfluechet wird nume politisch korräkt
es Arschloch isch hüt e Darmusgang
und d Uhre tigge nöischtens e chly anders
für immer heisst jetzt relativ ziemlich lang
u drum spiel i ou nümme Gitarre
sondern sächssaitigs Zupfklavier
sone schöni neu Sprach – es verjagt eim schier

würd sich das bi üs mal richtig düresetze
wärs villich gar nid eso verchehrt
aber mir hei üs ja bis jetze
sogar gäg Anglizisme erfolgrych gwehrt
mir ässe zwar „Brönsch“ u „Lönsch“
u nachem „Setöp“ gits es „Öpdeit“
aber das isch immer no Bärndütsch
i syre ganze Vollkommeheit

u bald scho wüsse mir überhaupt nümme
was mir de eigentlich no dörfe säge
de stöh mir nume no umenand
scharre mit de Füess u sy verläge
u drum säg i wyterhin Siech u Gringe
rede vo hinterfotzig u – pardon – vorderschnäbig
es mag politisch nid korräkt sy
aber es bhaltet d Sprach doch läbig

9. Kommissar

i ha hüt eine abegstoche
nach drü Stich isch är zämebroche
was isch denn da scho gross derby
es isch e huere Soucheib gsy
alles klar, Herr Kommissar?

i ha hüt eine vom Dach abegschosse
s isch nid mau e Tropfe Bluet derby gflosse
nume dr Krach, dä het chly gstört
s isch nid das was me znacht am liebschte ghört
alles klar, Herr Kommissar?

oh Herr Kommissar
gloubet mir, s isch wahr
i ha us Notwehr ghandlet
das isch doch jedem klar
oh Herr Kommissar
töif drinne syt dir mir dankbar
denn e Wält mit z viel Mönsche
isch wiene Suppe mit z viel Haar

i ha hüt es paar dür e Fleischwolf gla
jetzt isch nume no Hackfleisch da
Schuldgfüehl chöit dir grad vergässe
aber würd vo däm no frässe
alles klar, Herr Kommissar?

zum Schluss hani eine no ertränkt
mit Blei am Fuess im See versänkt
so tueni myni Problem löse
mit de Fräche und de Böse
alles klar, Herr Kommissar?

oh Herr Kommissar...

dr Kommissar het mi druf verhaftet
het mi uf d Wach mitgno
doch da lütet grad dr Wecker
bi no einisch dervo cho

10. Vorbild

oh wie sy mir guet erzoge
wüsse gnau was gilt
u das chunnt nid öppe vo ungefähr
sondern vom ne ganz grosse Vorbild

ja dr Me, dä macht alls richtig
u dr Me weiss was sich ghört
wenn me ohni Me müesst läbe
fänd me das scho unerhört

Me grüesst immer nätt u fründlich
Me chunnt nie z spät u isch gäng pünktlich
u Me isst ou schön
öb Spaghetti oder Fisch
u sitzt ganz grad
wie nes Brätt am Tisch

so tüe sie predige dr lieb läng Tag
öbs wotsch ghöre oder nid
aber i säge dir ganz ehrlich:
grad jede Schyssdräck mach i nid mit

will dr Me und i, mir zwe
sy no nie mitenand us cho
warum sött i denn uf ihn lose
är het sich a mir ou nie es Byspiel gno

Me kennt sich us dert wo Me wohnt
Me fragt nid gäng, öb sich alls lohnt
Me isch suber, flyssig und korräkt
u geit Me no id Schuel
denn redt Me kei Dialäkt

u so lehre mir ds Bsteck richtig häbe
dass ou nüt zwüsche abe gheit
statt gässe wird nume no diniert
so machts d Elite vor Mönschheit

dank em Me sy mir putzt u gschniglet
u hocke stäcke grad häre
aber wie'd i dere Wält uss überläbsch
darfsch de wieder sälber lehre

u so grüess i nume wes mir passt
schmatze bis alls rundum erblasst
mit de Schue wird über e Teppich gloffe
u alles diräkt ab dr Fläsche gsoffe

und isch Me trotdäm uf d Zämearbet
zwüsche Me u mir ganz wild
de überchunnt Me grad eis hinger d Ohre
i bi nid eine wo da mitspielt

denn Me muess begryfe:
i bi mys egete Vorbild

11. Walross

e ungewöhnliche Frundschaft
im Wasser und ir Landschaft
zum Glück nid ganz normal
zwüsche eme Ross und emne Wal

ds Ross, das spaziert am Strand
dr Wal, dä schwimmt am Meeresrand
so hei sies luschtig näbenand
bi guete Fründe lyt das uf dr Hand

da gsäh sie öppis uf sich zue cho
es chunnt immer nöcher u schwimmt nid dervo
und us em Wasser, da stygt e Koloss
u d Verwunderig, die isch sehr gross

sie frage: säg, wär bisch denn du?
das grosse Tier erklärts ihne im Nu
es Walross bini und i läbe da
Ross und Wal säge nume: ha, ha, ha

wotsch du üs de eigentlich höch näh
so öppis wie di hei mir no gar nie gseh
heisst das du hesch Flosse mit Hufyse dra
u chasch nid nur schwümme, sondern ou uf vier Bei gah?

nei, seit ds Walross, das chani leider nid
aber wes euch nid stört, chiem i gärn mit euch mit
da seit ds Ross zum Wal ganz gschwing:
ja nähme mirs mit, s isch offebar üses Ching!

12. Müüs

i muess nid wohne imene prächtige Schloss
wos füzg Diener het und es Strytross
dert würd i mi nid wohl fühle, wär i ou dr König
gäng meh Macht u doch no z wenig

es heisst doch, ds Wichtigschte im Läbe sygi chly
i cha däm nur zuestimme, so isch es gäng scho gsy
i bruuche kei Aff uf dr Schultere oder uf dr Läbere tuusig Lüüs
nei i wär gärn uf ere Insle mit nüt als luuter Müüs

d Müüs wo dert läbe sy grösser als e Chatz
sie chöi gumpe wie Känguru u singe wie ne Spatz
die ganz Insle isch schön chäsfarbig dekoriert
u wird vo re riesegrosse Obermuus regiert

d Obermuus het vierzg Tattoos u fahrt im Cabrio
u lost derzue dr neushti Nagerjazz us em Radio
d Müüs läbe genau wie mir mit eim Unterschied
sie schaffe, jage u brichte ou, nume chriegen tüe sie nid

Müüs heis zwar ou pressant wie mir, aber sie wüsse wenn ufhöre
sie müesse nid gäng neuu Sache boue u när wieder zerstöre
wär luegt scho besser zu syne Ching als e Müüslimuetter
u wär isch da gäng no so blöd u seit, Müüs syge Chatzefuetter?

Müüs boue keini AKW, ässe kei chemische Frass
sie läbe im Hie u Jetzt u hei derby ersch no Spass
Müüs chöi ou am chlynschte Glück gäng no Freud ha
u fyre das mit ere grosse Portion Muus o Schoggola

Müüs fälle keini Böim, für Papier druus z mache
u „rettet die Wälder“ druf z schrybe, das wär ja zum lache
i hätt gärn bi ihne gläbt, doch sie hei gseit: blyb färn vo üs
will dr Mönsch isch äbe e Schädling für d Müüs

13. Schnäggehüsli

är isch aube znacht über d Strass
u scho hei sie ihm alles vor d Füess gheit
Maischölbe, Rägewürm u Schnäggehüsli
är het sich dänkt: hei d Häxe wieder Spure gleit
druf het är alls ygsamlet, i ne Sack gsteckt
und verbrönnt im Garte uss
nur d Schnäggehüsli het är ussortiert
will jedes einzelne isch für ihn gsy wie e Musekuss

är het aube verzellt: weisch, i ha früecher mau Pomfrit erfunde
ha no viel Härdöpfel gha i mym dunkle Chäller unde
ha sie druf i fyni Streife gschnitte
u im Öl frittiert, drum heisse sie Fritte
u Glasse hani ou no erfunde
ha e Bütel Moscht i d Gfrüüri gsteckt
und so e neuu Sensation entdeckt

är isch aube uf em Sofa gsässe
u het Gschichte verzellt vo sym Hung
oder vo syre Schwöschter
wo gstorbe isch scho sehr jung
u jedem wo är kennt het
het är syni geili Schnäggehüslisammilig zeigt
u derby es Hüsli voll Schnaps trunke
uf jede Höheflug wo sich neigt

är isch jetzt e Ghostrider
bysst weder uf Chole no uf Granit
aber d Spirale vo de Schnäggehüsli
die dräihe sich no hüt
u jedes Mau wenn i vor somene Hüsli stah
luegi i die Spirale ine
wo sich nach links oder rächts tuet dräihe
und das alles ganz lyslig
oh die Schnäggehüsli

14. Kartei

was du machsch
was du seisch
wo dass'd häregeisch
was du wotsch
was du suechsch
über wär dass'd fluechsch
s isch alles gspycheret irgendwo
cha jederzyt wider fürecho
öb du di geischtrych verhaltisch oder primitiv
chasch sicher sy – es landet im Archiv

was du issisch
was du trinksch
mit wäm du di verlinksch
was du aklicksch
u kommentiersch
gäge was dass'd proteschtiersch
s isch alls hinterleit irgendwo
u schnäll hets eine füregno
hesch uf em Täller Gratin
oder Corned Beef – chaschs nacheläse im Archiv

zwüsche höche Staple vo Papier
u ändlose Date-Outobahne
erfasse sie jedes Detail vo dir
sött das nid zur Vorsicht mahne

was du ghouft hesch
u was aprobiert
es wird alles regischtriert
was du ir Chuchi machsch
u was im Bett
es steit im Internet
dr digital Spiegel zeigt: das bisch du
big brother is watching you
zeigsch di uf me Bildli erotisch attraktiv
es überchunnt e Platz im Archiv

öb i dr Stube
duss uf dr Strass
sogar bim gmüetliche Jass
z underscht im Meer

höch obe im All
Kameras hets überall
so gsehsch wie üs d Privatsphäre dervo louft
die hei mir scho lang em Staat verchouft
wed z letscht im Sarg lysch
scho ganz stockstyf
muesch sogar dert no härehäbe für ds Archiv

u für d Zuekunft dänk i mir nume
we ds Läbe bloss no stattfindt ir Kartei
hoffentlich blybe de wenigstens
üsi Wunsch u Gedanke no frei

15. Sächser

är het ir Schuel e Sächser gschribe
het när vo Stolz und Übermuet tribe
allne syni Note verchündt
egal öb Lehrer, Find oder Fründ
het drum dr Nyd vo vielne uf sich zoge
und isch schliesslich zum Zimmer us gfloge

doch deheim überchunnt är sehr viel Lob
d Eltere wüsse, dä macht mal e guete Job
u spändiere ihm für syni gschyde Sätz
e Reis uf Dütschland, nei so öppis Nätts
doch dert acho stuunt är nid schlächt
syni Leischtig isch dene gar nid rächt

„’ne Sechs, mein Lieber, nee wat biste dumm
du bist hier nicht willkommen, kehr’ wieder um!“
so het är dr Chopf ziemlich schnäll la hange
und isch als Verlüürer wieder heizue gange
dert isch är de zur Tat gschritte entschlosse
u het sich znacht mit eme Gwehr erschosse

hätte ihm d Eltere das besser erklärt
würd är villich no läbe ganz unbeschwärt
aber är het nid gwüsst, dass e Sächser e Einer isch
und dass’ ir Schwiz anders louft als nöime süsch
aber eis gilt i jedem Fall, da chasch sicher sy:
öb’d e Einer oder e Sächser hesch – bhalts eifach für di!

16. Vulkan

mir hei üs lang scho nümm gseh
zwüsche üs lige Ewigkeite
us de Ouge verlore
all die verpasste Glägeheite
aber hüt muess es passiere
hüt lifereni mi us
du chasch mi filetiere
i lah alles zue, gah dir nümm druus

es isch wie im ne Vulkan
chumm mir bräche zäme us

dräh mi düre Fleischwolf
mach us mir es Feschtässe
press mys Hirni us
bis i alles ha vergässe
chasch mi usenang näh
u wieder neu zämesetze
mit myre Hang derzwüsche
chräftig d Türe schletze

choch mi uf chlyner Flamme
bevor'd a mir d Chralle tuesch wetze

egal woni uf dr Wält ou wär
i weiss du würdsch mi finde
das Gfüehl würd mi yhole
u nie meh ganz verschwinde
wär i ou in Rio
i dere ewig wache Stadt
oder im Museum z Chicago
vor em Bild mit dr Insle La Grande Jatte

oh du schöns grausams Wäse
schiess mi z Bode, drück mi platt

jedes Jahr fliesst nur ei Träne
aber es wird i 1000 Jahr nid vergah
u ds Wasser wod nid chasch suufe
lahsch am beschte wie d Lava
eifach wyterfliesse

wills sowieso z bitter isch
es laht sich nid versüesse
bis du drin gschwumme bisch

chumm zeig mir dys Gsicht
bevor das Fүүr erlosche isch

nüt isch relativ
eis u eis git wieder eis
i grabe bis zum Ärdchärn düre
lande wieder uf em Stumpegleis
I striele dür töifi Schluchte
u das Fүүr geit langsam us
es gruust mi vorem Erwache
es isch e Hölleritt bis z letscht u drüberus

schiess mi i Vulkan
und i briche wieder us

17. Rabenäsch

mir styge Stäge uf u ab
vom Ching bis zum Greis
nähme d Tritte mit liechte Füess
Stäge sy üses Gleis
s git kei Stäge i Himmel
d Höll het expandiert
dr Tüüfel isch CEO
dr lieb Gott pensioniert

i bi ds Kuckucksei im Rabenäsch
vo Müüs zerfrässe, ha d Rattepescht
rolle dürab wo mi dr Wäg hifüehrt
ei Syte isch no ganz, die anderi lädiert

d Höll cha im Estrich oder im Parterre sy
am Ändi vo dr Stäge oder vis-a-vis
we du nid stah blybsch uf dere Stäge
isch das ou scho bald e Säge
im Himmel voll Gyge hei alli dr Blues
sy verstimmt u troue sich nümm usem Huus
i chlaue uf mym Wäg Härze u Närve
ha gäng e fuule Trick in Resärve

i bi ds Dänkmal vom rabeschwarze Gwüsse
uf mi het niemer gwartet u glych bini erschine
bi d Hiobsbotschaft, dr Sturm nach dr Rueh
u ds Gottlett vo dr heilige Chue

i bi ds kabutte Lämppli wo nid warnt
ds giftige Chrut wo sich als Heilpflanze tarnt
d Zytigsänte, dr wyss Elefant
dä wo dr Bäredienscht erbringt
dr verzouberet Ring a dr Hand

bi versumpft i dr Heimat vo de Krokodil
ds zinkte Ass im Chartespiel
i bi d Ruete wo im Trüebe fischt u ds Holz wo verlischt
ds trojanische Ross u ds Byscht im Schloss

bi dr Chnüppel us em Sack u dr bitter Nacheagschmack
dr Wärmuetstropfe, dr verlornig Malz u Hopfe

dr Klatscher wo dir um d Ohre flügt
u dr Spiegel a dr Wand wo lügt

weisch wies isch als Kuckucksei im Rabenäsch
bisch elei unter vielne Gäscht
bisch glych wie sie u doch nid glych
und das imene verlorene Rych

wed nid stah blybsch, wirsch vorwärts cho
aber wed uf em Holzwäg bisch, merksch es o
mir styge Stäge dürab, bis zum Ärdchärn
aber äbe, mir makes ja so gärn

Stäge vo dr Geburt bis zum Tod
Stäge in Freud, Leid u Not
immer ei Tritt nach em andere
bis mir i d Gruebe wandere

18. Hingerem Mond

es isch üs bibracht worde
aber mir heis scho lang vergässe
zwar nid vo de Eltere
oder vomene gschyde Profässer
nei ds Läbe het üs glehrt
dass es besser geit mitenand
und wenn eine im Schyssdräck lyt
de gib ihm dyni Hand

ds Schicksal het e riese Händschegrössli
und schlaht erbarmigslos zue
aber mir stöh immer wieder uf
mir hei halt no gäng nid gnue
sy halt scho chli masochistisch
u wei gäng so starch tue
mängisch fliesse roti Träne
aber das ghört halt derzue

läbe lehrsch nid i dr Schuel
nei das findet dusse statt
u wär nie glehrt het, wenn dass gnue isch
dä wird ou später nie satt
es git kei Schlüssel für die Tür
wo ds Glück derhinger wohnt
du chasch überall uf dr Wält sy
u bisch trozdam hingerem Mond

villich bisch ou für öpper gstorbe
steisch urplötzlich wieder uf
so wie sinerzyt dr Jesus
u holsch no einisch ganz töif Schnuuf

am Tag schynt d Sunne für di
ir Nacht geit sie unger für mi
hingerem Mond u när links
quer dür d Galaxie
dert findsch du mi

was nützt dir e riese Fernseh
we nume Läärlouf chunnt
für was bruuchsch e Charre
e grosse Chüelschrank macht nid gsund

lueg mau, das isch dr Zug wo abgfahre isch
wed wotsch, chasch ihm no winke
gsehsch syni Liechter dert am Horizont blinke

das isch dr Ändspurt
u das isch die Zielgerade
u när hinge links
furt mit Schade

we du nid weisch wo du landisch
de chasch besser flüge
u we di niemer fragt wies dir geit
de muesch ou nid lüge